

四庫全書

集部

欽定四庫全書

集部

滄洲塵岳編卷四至六

詳校官庶吉士臣瑚圖禮

主事臣呂雲棟覆勘

謄錄監生臣范維城

謄錄監生臣卞爾巖

謄錄監生臣黃維

欽定四庫全書

滄洲塵缶編卷四

宋程公許撰

五言古詩

今日良宴會

良辰不可久飛憶會華館雕俎粢陳前羽觴勸引滿危  
柱瑟難和急軫琴失按含思以亮激響入凌霄漢四坐  
聽我歌罷倚長歎勿遣歌聲悲悲多聽者慘振轡騰  
康莊及此歲未宴

春事無幾端居蕭索追懷成都舊遊慨然有賦  
憶昔吏錦城寄隱雲水鄉蕭散不任事上官容我狂短  
蓬漾空明舞棹歌滄浪會心多勝友一舉累十觴芳春  
樂事饒飛憶集寶坊意行無定在有花即相羊馬蹄穿  
夜市奚奴背詩囊三年一炊黍舊遊想微茫誰知涪江  
濱側翅不得翔醉飲無與和三歎熱中腸雨晴好風景  
輕輿便晚涼亂絮撲晚靄牡丹泣殘粧春物能幾何營  
巢燕飛忙茶事迫榆火餽膠催粥香我本樂煙霞失身

縛簪裳官曹幸云冷詩債可不償錦城未即去十景茲  
難忘安能窘邊幅低頭甘鎖韁升沈自天分矯情恐有  
妨借我白玉壺為君歌慨慷

餞寄菴居士龔彥質

彥質僑處南山僧寮泊然無營趣尚高潔某  
嘗為彥質謀投老不可無棲宿地亦當及茲  
時圖之贈以文庶幾見者或一動心而彥質  
素不苟求未嘗輕以示人也彥質遊甚廣莫

如殿撰都承敷文大卿二趙公厚為彥質辦  
此更以古詩二十韻餞其行

煌煌帝王都列第喧絲竹林園競選勝四匝湖山曲誰  
知南屏下老叟甘幽獨憶從古枯來紅頰鬢鬢綠王侯  
爭倒屣交友為屬目引觴百壺倒授簡千穎禿功名良  
誤人日月如轉轂侵尋四十年一往不可復浮雲玩身  
世投老寄僧屋堅忍不苟求趺坐淡無欲人生固幻夢  
要須有歸宿買山豈不念探囊一捧腹舊交上連壁情

未忘伐木蘇臺香正凝寶婺駕已夙談笑百金揮拮据  
三間足何妨山水窟就訊高燥卜行矣不可遲片帆浪  
花盛歸來督工師涓選亟營築開軒納雲水繞檻藝松  
菊身閒心自平長把黃庭讀

三伏中積雨如秋

峨眉三日雨客館六月秋幽懷無與娛欹枕清夜遊炎  
官失聲勢萬木皆商謳一涼德我厚耿耿何隱憂憂多  
白人頭頭白可復休積陰忤正氣潢流冒崇邱世故莽

難期病根寧易瘳履霜不知戒堅冰諒難尤天運不停  
機明當火西流勿以餘熱在而忘晚歲謀家貧迫短晷  
及時戒衣裘

縣圃蓮花方開同時木犀吐芳劉光遠仙尉賦

詩為和韻

季夏苦積陰泥運殊窘步彼姝水花紅媚此晴色暮邈  
迨小山桂纔洗仙掌露相携齋閣來不著丹鉛汚杲之  
與黃香胡為此同聚向來古錦九散落不知數吟腸久



荒澨幽賞但默喻殷勤吳市仙能供巖壑趣詩味淡愈  
佳交情凝有素我願同薦蘿得與長松附

十四日同張伯修羅堅甫大智賞月探韻即事  
感興殊激懦衷翌日會保福辱詩示教借張大  
韻同賦

涉秋苦多陰嬋娟喜見乍天巧竟作難借此三五夜屯  
雲滂四面如鶩俗士駕寶坊盍朋簪尊酒共清話諸君  
讀書眼明不失纖罅天眼物昏之誰為彎弓射連宵耿

孤吟虛窻自高挂竹風靜逾爽露葉燦可畫夢踏市橋  
去醉眠僧榻借陰晴且勿言幽賞可能罷恨欠截老龍  
三弄倚風榭酒酣歌慨慷四坐勿渠詫邊塵日湏洞志  
士惜閒暇君看古聖賢憂樂以天下持此閱人多何但  
如傳舍短氣吐復吞欲言恐遭罵徑思投紱去甘老漁  
樵社世論熟脂韋人物歎哀謝相期崇令猷蘭鮑觀所  
化

重陽後一日親友會飲於滄洲以初九未成旬

重陽即此辰探韻得初未二字

雅志厭闐闐考槃樂郊墟言歸憩桑梓不憚躬拮据歲  
晚此棲宿佳氣鬱扶輿淫雨度陽節晴雲吐月梳獨酌  
良亦佳所思在羣居晨興喜復晴草具何可徐黃花有  
餘馥白酒無多儲清灘蟄雷吼輕霞綵幄舒翳然林水  
間舒嘯天籟虛雪髯醉先起衆賓且躊躇人生有定分  
適意不願餘衣食粗能給吾當賦遂初相期晚節堅結  
社同樵漁

風露澹秋容汀洲肅秋氣吾廬倚高寒遊日周品彙既  
空買山資恨欠除堂費醪觴漾離菊淺酌殊有味蜜餌  
雜園蔬何妨食之既興酣一憑眺情感忽累愼裔夷恃  
天驕邊關猶鼎沸殺氣纏慘澹將材乏沈毅吁嗟楚芟  
荒遑恤頃筐暨腐儒拙料事積憂漫如蝟伊昔賢哲人  
用智奔流未駟隙詎容追蟻潰可不畏索裘已較晚寒  
機密經緯

過房公湖臨發廣文載酒登南樓聽隱士陳希

逸彈琴讀鴈湖先生詩及悅齋先生賦

湖蕩匝城府堤柳一徑通森戟畫漏永闕如墟野中掣  
鈴三日留鬱鬱殊寡惊登埤展遐眺盪我磊砢冑溝畦  
磨衲麗煙蕪圖米工廣文一尊酒邂逅清賞同慨昔石  
林老小駐雙旌紅燕坐鳧鷖退行散龜鶴從得句陵子  
美高世猶房公想此據胡牀長嘯延清風想此躡珠履  
和月吸酒鍾想此援采毫醉題揖遙峯想此披綺裘憑  
高目征鴻逸駕渺難追風光為誰容空餘翰墨香披拂

葭葦叢翠琰子由賦正聲響笙鏞千年古徐州綺䟽貫  
晴虹過眼不再讀恨我性識蒙喬木噪晚鴉低回馬首  
東綠綺有餘韻因之訊仙翁

送安少愚下第東歸

去年遊凌雲傳觀一篇書問客誰所作作者安少愚少  
愚賓城人萬里走東吳憫俗日搶攘正途欲荒蕪磊塊  
不能平憂憤何當攄推枕一長歎落筆萬字餘才難繆  
取舍政棼費爬梳國讎不可忘儲德要力扶肝膈無留

藏首末詳繹鋪吾豈貪狗名致主於唐虞書成詣匭投  
甘心斧鉞誅九天隔雲雨萬目爭睚眦聖恩不忍殺放  
使歸田廬我心日起敬未見長歎歎今年科詔頒君來  
試成都邂逅忽傾蓋名下信不虛貌不踰中人若為膽  
滿軀革囊三尺劍束書一蹇驢感額談世事抵掌嗤俗  
儒慨慷三策陳傲睨衆口諛諸公眼如月誰遣紫奪朱  
少愚嘖然笑得失毫髮如行止諒由天通塞何關渠歸  
歟三間茅搜我萬卷儲抱膝梁父吟曲肱味道腴雅志

期古人昂昂千里駒安能徇衆兆汎汎水中鳧今晨忽  
叩門謁我摻執袂劇談重激昂欲去仍踟躕時俗競佻  
巧捷徑爭馳趨悅耳或為忠仕道寧免迂啗以鼎食味  
誘以蛾眉姝煌煌萬釘饒翼翼潭府居衆醉日以酣獨  
立誰為徒世豈有巢由甘受泥滓汙或俛首州縣或遁  
跡樵漁顧謂今乏材毋乃幾厚誣失計如我輩苟為五  
斗驅有志困風塵浮沉非故吾思昔新法行士有鄭介  
夫斥監安上門憤世膽氣麓一朝勾驛傳奏䟽列畫圖



天子惻然感民力，幾少蘇九原。凜如生千載，足起予荆舒。  
最護短植黨，盤要途如何。職冗賤九關，許叫呼偪仄。  
復偪仄視今，良可吁。喧然衆楚咻，甘作羸秦拘。所以見  
君子，羞汗如隕珠。牛驥不同皁，雞鳳寧同姦。要當操此  
心，聖賢為範模。借問蘭玉棄，如何蕭艾敷。詩成為君歌，  
臨風怳暗鳴。向來清廟瑟，忍濫齊門竽。

贈吳郡諸居士

居士有官不仕，善醫不責報。以道義自持，隱

君子也友人楊良臣求詩故贈之

終南徑甚捷結茆鄰帝鄉朝為谷口翁暮為省中郎先  
生獨何事寄傲臨滄浪才高世莫染德薰名自香青黃  
分誰數膏火竟堪傷遊心聖賢域脫身憂患場世路雖  
齟齬天衢自騰驤捫虱竟誰見卧龍興何長借居仲奄  
里未升公德堂十年逐流擯千里坐相忘顏齡或可借  
辟穀豈無方終期繼青蓮搖筆頌紫陽

過眉山謁鄉耆宿李八丈提刑

憶昔下吳會拜公古渝州別來忽星紀不知幾三秋豈  
不願舂糧占烏渠渠屋良期若難儷千里勞遠目公家  
難兄弟與蜀關重輕峨眉疊連娟石筍屹崢嶸維國有  
著龜維士有司命並生天地間受命獨也正憂端日搶  
攘世論滋軟熟誰謂空谷遠有美人如玉我如南州橘  
托根非不深踰淮恐成枳望遠勞我心鮒背髮皓然齒  
頰探骨鯁跪履乞一言書紳以自儆

述志

仙曹寄江干吏隱適吾願西軒館梅友屋老狸鼠覘坐  
令高世姿不耐塵網胃殷勤數問訊餘力稍營繕八窻  
敞虛明孤標對老健佇立慘澹中恍覺容采絢天風發  
奇芬霜月潑冷艷官卑苟逃責交淡日相見凍搖哦詩  
吻堅作忍饑面癡頑信可憐無取復奚羨村醪未必佳  
苦味且耐嚙洗醎壽親尊春和元不欠勿競桃李場恐  
為吾友玷

三年銜恤絕不吟詩既奉祥祭觸緒摧裂偶得

古詩三章呈叔逢兄併似彥威姪

鬢髻聯鴈隊娛侍三老人清風一家法歡顏四時春轉  
矚二十年俯仰含悲辛聚散泡起滅了知幻非真忽忽  
如有見耿耿恨難平孝愛自天性寧與迹俱陳

母慈不逮養翁健長相依重關一回首及瓜時當歸平  
安墨未乾諱問心有疑繭足跛管屨高堂空總幃罔象  
不可索流光倏如馳五鼎嗟奚及一生風樹悲

秋風殷巖壑萬木皆商謳棘人有餘哀攬衣良夜道三



空山學仙子幽獨性成癖誰令一念差失脚塵網密隨  
緣翫泡影隱思曉繼夕了了三生夢掣電了無跡豈不  
志遠遊誰為傳羽翼抱關覘紫氣跪履問黃石靜慮儻  
冥契玄機詎難入縞髮古仙公遺世而獨立愴恍如有  
遇一言曰守一引臂許相從長生託瑤籍

送悅齋先生

上躬攬權綱與天下更始悅齋先生游被宸翰  
趨朝行闕擢界秋卿渴佇黃髮之詢別膺白

麻之拜某擘舟追送引睇嫪戀激獎訓誨真  
情郁然敢不肅戒行李拱俟造命作五言古  
體一章少抒衷曲語意斐拙惟高明賜覽

風塵三十年世途日險窄嬋娟棄土梗倚市競容澤大  
雅何寂寥志士三歎息維皇惠斯文為國永壽脉靈光  
歸獨存碩果有不食坤維返全璧北墅歸散策天開景  
氣新晴破層冰積疇咨耿宵慮圖任先耆德披雲絢天  
章趣駕觀宸極喉舌俄申命股肱待宣力解絃未為難



航險那可忽涇渭不同流薰蕕詎相入所虞憤失職陰  
拱或伺隙事須衆賢和乃可珍行堅沉幾陛下聖虛已  
言路闢稍欣元氣充猶慮外憂迫敵情任反覆廟論須  
謹密功名百尺竿家國萬金璧平生一知己瓣香無愧  
色駑怯勉荷擔遲頑費推激大艣駕雲濤薰風飽帆席  
丁寧耳面命遠別何須惜寬以七月程修門拜赤舄

上後樂劉先生左史十首用襄陽詩兩句行藏  
堅晚節進退法先民為韻

永平昔全盛，舊學尊五更。惜哉趨舍繆，眩眼車服榮。恭  
惟自孔氏時止，亦時行心泰。無不足外內，誰重輕。

我豸凜霜簡，立螭迫荷囊。從渠衆醉酣，我自深林芳。歲  
晚髮雪白，德稱腰鞶黃。世無香山老，誰與論行藏。

前谿文緯國，東谿學草玄。補處自天授，絕韋待誰編。淵  
源後谿水，脈絡千載傳。茲事端不朽，松石同其堅。

公有  
松石

一峯以  
扁堂額

厚德最耐看，士當論志遠。云云物歸根，混混泉有本。眼

明長庚曉心知歲華晚後生須槩獲所願加餐飯  
鹿門憶龐公栗里懷靖節我嘗評斯人用則同稷契空  
谷倚逍遙風塵俱駭屑明發耿不寐長歌彌激烈  
事往置勿言積厚報豈愴毫眉兩山尊照眼雙壁潤袞  
袞生公侯世佩斯文印譬之水盈科吾方見其進

楚都初拜公里門跪承誨一言忽與醒頓首汗浹背志  
遠苦力短寸進而尺退大書揭齋顏朝夕警不逮

公許  
嘗請

誨先生謂其資稟既純當加  
充養之功因以扁書齋云

月冷塞垣刁塵暗西風策所思天一方飄飄管寧恰我  
欲往從之問以安樂法雲深波浩蕩定自鷗鳥狎

千載嗣韓統斯文諒關天字袞失所歸何以革其先陟  
此有遺恨琢石圖方鐫百拜涕綆縻萬一彤史傳

負米困風塵靦顏白頭親歎息執戈苦走也猶幸民依  
依孔牆夢拍拍芹水春安得萬里風駕予往問津

和大著何兵部

兵部還南林寓居食鑑湖祠祿錄寄近作中

有和坡仙所賦鮮于子駿新堂二首末句寄  
語蓬萊仙千里永相望此意何可虛辱塵緒  
膠擾會移容臺奉祠太室始得和答

何侯起膠庠歸立諸老後霜空茂檜栢驚秋笑蒲柳平  
生經世心短舞困長袖白頭謁承明彩闥炳郎宿去國  
一漁舟順風輕放溜寒花耀荒寒靈芝茁腐朽身間澹  
無慮歲熟宜釀酒更將自性觀妙契得無漏

憶昔歲云暮言趨君子堂昕班偶同歸三度金節涼木

天並英遊東壁分餘光日者對宸扆直聲動巖廊豈不  
志歸田胡遽喧巧簧別久花竹秀山積書傳香時無塵  
外交若許令支郎願言從之遊珪璧保闡望

和廬陵士尹八俊投贈韻

白苧裁春衫京塵可得緇一麾江海去何成復何虧馳  
驅兩輪朱蕭騷雙鬢絲所欣歲功就千里春臺熙素念  
恥伐檀煩政戒楚茨同心何自來邂逅得我師金華仙  
去遠文其不在茲諸公競唐體頽流誰楫維命將騷雅

壇幸子無牢辭為我緩節歌紆我商謳悲邊塵塞鄉國  
介鱗語侏儻登樓仲宣賦遣興子美詩懷歸自無計慘  
戚將奚為排雲天九重抒我危苦詞

壽張敬立二首

高堂八十親備福九五疇虎節安山國鴈序班霜秋積  
善有源委觸目皆琳瑯一笑壽觴舉背諼可忘憂  
育德譬源泉務學如農疇盈科會歸海力穡當有秋期  
君懋遠業東序陳大瓊對駸竭忠鯁一洗宵旰憂

上憲使張郎中壽借西山集中甲申秋所賦雨

荷詩韻

榮途驚一世志士獨苦心君看曲江公中宵梁父吟豈  
無平反笑可使貫索沉獨醒晚衆醉枉尺那直尋世事  
本前期朱明多盛陰氣運有伸屈扶持要賢能金甌一  
擲誤天步深淵臨瓊圃擷衆芳願以遺美人繡斧岷雪  
外閭闔雲海深請彈薰風絃再拜壽學斟功名儻來耳  
一念君與親



壽憲使江寺簿八首以座右公廉勤謹忠信和  
緩八字為韻

並生宇宙間分殊理則同訂頑有明訓造化與同功心  
腹與手足疴癢均我躬皇皇一仁字天下皆為公

人心無底谷貪求何自饜徇名膏火熬徇財刀蜜甜受  
命獨也正取造物者廉孤竹有世守範防無乃嚴

咸池浴曉光西汜俄夕曛流景寧我貫用志可不勤王  
事念靡盬聖恩期策勲歲晚須糗糧及時力耕耘

吾師孔子孫云莫見乎隱所以盡性學必於獨也謹兩  
間陟降異一念堂與近何但丹筆持能使明克允

乾坤莫崇卑君臣分則同中心一有慊何以字曰忠孔  
曾為渠獲伊周其事功千載誰嗣音我願順下風

豚魚自物耳猶可孚以信疑心一芥我相靡而相刃君  
看易中孚義取說而巽虛心竊實理可不精體認

和與同近似同乃異於和九官遜虞廷做戒而賡歌不  
然水濟水後患將如何期公調鼎食一柱障頽波

緩有用有體事須明眼者用欲行而宜體則偏於緩射  
審固而發斯理一以貫仁靜壽可占巧歷那得算

上游參預壽二首

以檜石為韻余所寓館乃參  
舊第屏畫檜石題詩在焉

並生覆載間肖翹無小大陰陽所發舒榮瘁各變態若  
為壽命獨厥有松柏檜鬱鬱被澗阿童童狀車蓋神明  
扶正直霜雪表堅耐豈不願擁腫而使匠石愛大廈須  
柱撐寧免萬牛載一柱屹擎天羣生此依賴尚念楹桷  
材無可柞械拔風雨任震凌安宅遍宇內

金... 卷四  
河流貫陝號底柱自中立江水迸瞿唐灑瀕制其溢豈  
此一拳多雲根闕奇質檜柏相因依煙霞老山澤閱世  
縱堅久於人果奚益漲洪彌八埏晚視如已溺巖巖國  
嵩岱萬仞峙鐵壁隻手障狂瀾九鼎奠磐石我自不動心  
深根而寧極還歸金泉山采藥鍊金液

壽曹大博以東憲臺治新築亭館扁榜寄意

聖道如太極品彙自生成二人各言志點也心和平春  
風發高詠懷哉沂水濱千載寄遐思光景無邊春一潭

鑑寒碧方寸洞虛明  
執卷恍瞻前舍瑟鏗  
有聲勿遣柱  
後文醜我春風醇穹  
舞麗景舒琴歌南薰  
清誰知此中  
樂天理皆流行

右詠歸亭

蔚藍水中天  
宕堯千萬重  
樓觀聳煙霞  
光景浮星虹  
天上老仙伯  
萬劫冰雪容  
笑下金華山  
長歌唳霜鴻  
一去五百年  
山頭忽重逢  
身衣直指繡  
神超蓬海東  
搖蕩瓊臺光  
拍浮玻瓈鍾  
瓊臺縱可樂  
虞庭渴夔龍  
丹鳳銜詔

來人侍甘泉宮

右垂光亭

涪江駛清瀏四山玉連環中有一掌平萬井浮晴煙鶯  
花隨世界妙語發天慳公來挾其秘作堂娛燕閒襲芳  
皆俗好伐木友士賢念昔白波洶止沸談笑間熙熙春  
臺樂誰知有今年初度沸歡謠願公眉壽延移此世界  
春浩蕩彌八埏

右鶯花世界

壽喬平章三首

峒堯崑崙顛縹緲虛皇宅下晚四大洲何啻一塵積萬  
類託其間擾擾無暫息強弱互吞噬殺氣干斗極虛皇  
燕五雲憑軒慘不憚絳節授金童瓊函探寶冊運會有  
度期欲藉老仙伯

老仙何自來文焰貫東壁八十五春秋骨健神氣溢權  
衡有定度著蔡無遺策若非安期生定是李八百堅苦  
海津梁壽斯文命脉后皇大所畀陶冶妙無迹故山豈

不思老屋須柱石

屋老當奈何風雨撼四壁主公志經營所賴有匠石度  
材林數幽計土帑詹積心思妙規製指授契繩尺逮其  
萬間具夫豈一人力柱天紀元功眉壽永無極周宣當  
中興拜手歌考室

屏居北郊自秋涉冬絕省人事觸緒有感託之諷  
吟書雲前一日緝成八章寓興抒情非以言詩也

氣運有盈虛品物迭滋耗人生於兩間誰能長不老胡



為翫鮮榮而獨恨枯槁。婉孌兒女態，愛惜容色好。志士  
競修名，覽鏡慨華皓。所念固有殊，達觀同一笑。本來真  
妙明，何有少壯老。茲理非言傳，惟心自深造。

斷梗得棲泊，高堂擁圖書。中宵風露氣，營我方寸軀。靜  
慮何易感，有銜莫能祛。今古一瞬息，智愚等丘墟。戰奪  
日相尋，死生互吞屠。念此耿無寐，推枕長嗟吁。天理諒  
好還，人謀何可踈。

宿嗜本幽閒，世途倦馳騁。迫茲門戶託，強把冠佩整。招

手誤一來麾退諒予警寬恩假郡寄靜俟亦天幸橐空  
歸無家旅泊仰微廩如聞爛柯谷宛似飛仙境苦飢問  
豹胎留渴須遠井天將厚所畀吾寧不少忍睡起一欠  
伸篆煙凝晝永

口為禍之穽異者同之仇誰能噤不語兀兀如羈囚我  
豈好違俗心未忘好修本不慕華顯寧有忤與求逍遙  
鵬鷗同貧賤非所羞風濤漲平陸駕子一虛舟未如泯  
機智鷗鳥與之游吾今已得師稽首漆園周

鳥飛暮知還螿微亦有藏遊子悵無託故鄉那得忘  
輻歲橫鶩生涯日淒涼骨肉各竄匿冢祠缺烝嘗萬里  
一緘書臨風淚千行垂白念汝兄憂樂苦相望安得附  
羽翮奮飛同一觴

西陲失支吾如老屋積腐墻閹縱蹂躪堂屋何依怙伊  
誰階此厲乃為元老誤疾痛切吾身利鈍難逆睹瘴暑  
困新恩隕星泣忠武梁壞將安仰天高杳難訴向來十  
二樓捲簾誤一顧灑淚嫁時衣誰與論心素

坤維以文瑞民俗本柔淑何代無戰爭寃哉今爾酷戎  
馬塞里墟劫鈔遍林谷平生金石交屈指半鬼錄從子  
尤可哀別歸奉水菽伯姪併戕殞荼毒復荼毒探囊數  
幅書吞聲不忍讀崑崗焮烈燄寧辨石與玉叩首一爐  
香請為遺黎贖

姪子能伯請假歸奉親同  
其伯父先後皆為敵所害

南山翠鬢髻四荔拱故宅采衣侍三壽教愛如夙昔曉  
然一夢闌無復萬里隔了知恩愛縛障我修行力亦嘗  
勤遍叅漸欲空結習妄念絕攀援自性非假借

入聲百千

三昧門惟此一事實持問諸老禪少露真消息

--	--	--	--	--	--	--	--	--

欽定四庫全書

滄洲塵缶編卷五

宋 程公許 撰

五言古詩

理舟入奉大對臨發有賦

弱齡誦書史所慕在經世覲顏科目中頗恨愆素志天  
府兩貢書恥逐時粧媚諸公誤賞音偶玷春官第玉明  
渴疇容臨軒有故事明當鼓枻下陞對去天咫尺采蘭有  
常供胡為輕萬里趨庭願有聞丁寧汝其識謹無曲學

阿恐作儒冠恥士當志遠大富貴餘事耳百拜請書紳  
誓言其敢替萬古洙泗傳豈為青紫計

良月十六日以祈晴宿齋郊壇寺僧拉登梅岳

讀高孝兩朝宸翰記事

祝冊頒九重郊丘以晴禱小臣職駿奔單車勸塗潦崇  
阜踰嶽嶸層壇敷秸藁中興念經始面勢若天造濤雲  
日兩潮幄霧山四抱袍毳亦可人杖藜共幽討枯梅傲  
歲晚陰壑得寒早勳華昔同來奎文絢麗藻山靈沐高



澤虹彩軼晴昊苔蹊幾窈步梭榦撐健倒嵌竇咽泉流  
金石韻擊考齋廬耿燈青簷花垂帶縞苦憐風力癡未  
快霾陰掃排雲出烏輪測景進黃道六合還清明烟霞  
願投老

和憲使張郎中

四海一奇男象賢真東之繡斧外執法滯淹猶在斯冰  
壑棟梁具鳳梭雲錦機粉省趨含香墮書壻封泥生平  
方寸丹雲端雙闕齊小試川檝手晒網蘆中磯以道拯

世溺先事防繻和三江昔怒號一席今淪漪平波淨殺  
浪祥風浹瑤池八極滙濤瀾四顧蛟涎危孰能戒維楫  
重與謠平夷

上茶使鄒郎中孟卿

四海一道鄉千古有生意元宗得君侯風流是以似宵  
然天機深寧以物欲累丈夫要如此步步皆實地  
政術自學術本來同一機後生溺華采用世理或違恭  
惟自孔氏六籍探指歸心清事自簡吏瘠民則肥

忍話去年事令我膽欲碎公獨於此時砥柱衆流滙事  
難見君子爾曹費車載海山危風濤當有巨鼈戴  
節傳擁玉帳天遣西南來怲怲朱絲繩皎皎明鏡臺稂  
莠亟芟夷本根費栽培度外廣物色世豈真乏才  
廣文官獨冷博士冗不治况此侯國類贅哉童子師蕭  
散非鄭老文章慙退之可能冰雪地一借春風吹

喜雨上西清崔先生

東皇司發生何以忽憚怒旱乾遍兩川陰陽錯常度侍

晨秉清德方獄煩卧護隱憂切四體曉夕煎百慮庭暴  
矣以為丘禱元有素皇明一頷首膏澤倏如靈豐隆鼓  
增氣耕父愁失據苧桑鬱華滋餅餌當厭飫乃知天九  
重不隔香一炷宇宙滿戈甲椎剝劇刀鋸殺氣慘未除  
衆感那得顓毋以休咎徵諉曰水旱數憂端轉搶攘邦  
本須愛護願公遲東歸為帝寬西顧以萬金良藥起衆  
兆沉痾使民安農疇繫弓藏武庫為霖澤四海婉迹商  
巖傳

工侍國史奉御香禱雪上竺前一夕雪瑞已應  
道間志喜成詩以示敬借韻同賦

庚子歲維夏亢陽一何驕侵尋徂暑迫惻怛聖慮焦祈  
禱喧三農雩祀奔百僚商飈忽以厲老魃意愈囂萬井  
沸湯釜四野烜赤爍俄聞罪已詔還下中興朝寶香歎  
太一嘉薦羞廟祧移蹕給孤園熏心梵音潮芝蓋屏不  
御鸞扇亦罷搖還宮慘玉色轉燭翻天瓢小臣忝侍祠  
囊封叩層霄帝念亦勞止曠災殊未消良月始沾洽封

畿轉蕭條白瑞彌渴望沍陰那易料測景展繡紋飛霜  
困青要麥芒鬱不吐蔬甲半已凋足蹙叢祠趨潔蠲沉  
水燒忱念交盼蠻同雲散瓊瑤夜窻訝明皎曉檻俄紛  
飄天意竟作慳瞬息倏已消冬瘟幸稍壓蝗蝥故自饒  
東皇趣命駕北斗將旋杓更須絮亂撥間作珠碎跳儻  
幸尺許積庶幾食可邀莊子邀食於地民脉餘幾何邦儲况復  
朽但知骨髓漚惶恤膏火焦老我雜班綴素絲颯飄蕭  
強令典綸綉拙不工琢雕炯茲方寸丹敢以後福徵世

味本枯淡癩思劇蒸敲灑血書綠章飛神朶清颶玉食  
自不甘黃竹寧復謠扶持倚梁棟諮詢及芻蕘正途會  
四闢賢旌欲旁招上帝如悔禍盜賊非難梟斂盡戰鋒  
慘重使農畝劬玉燭調氣機黼辰寬盱宵量才愧擁腫  
賦分甘漁樵經綸有管樂議論付董鼉故山歸去來歲  
晚樂逍遙曝背茅簷日擊壤歌帝堯

代上夔帥丁文伯

璧月行素空流魄寒潭水水非與月期月豈待濯洗天

光發於定妙契元一理士生無南北樂在相知心同行  
不同調有如辰與參一言針芥投山水皆知音畏齋天  
下士執鞭愧我後當時儉府蓮最說庾公秀十年一欠  
伸西樓黯回首油幢古夔子鎖棘外南宮寶鑑貯英裁  
麴筆題至公訛舊一以悽浩蕩華表風宇縣莽烟塵人  
物嘆今眇蘭芷悶其芳所御或茶蓼隱思不遑寐令我  
憂心悄古今幾枰棋勝敗無常形世豈欠國手一著何  
可輕但恐當局迷渠知死可生向來一寸心行世幾護



落矯性動有妨幽思誰與豁為君歌慨慷長風起天末  
入都一年餘舍館五遷最後得楊園空屋僻遠  
市囂寬潔爽塼火後莊文府以中旨攘奪倉皇  
徙寓奉常之寅清堂成五言長篇

瀆江萬里來武林一年客飄搖無定棲一一得安宅委  
巷遠塵囂八憲耿虛白冰曹省造請公退味禪寂乃者  
赤燥怒橫為閭井厄羈貧幸我貫安坐有慙色侯門意  
睥睨府檄加峻迫倉皇襍衣被包裹到書冊曲臺許借

居虛堂暫休息砌蛩伴宵吟樹鷓趣晨汲隨寓亦足娛  
一枝更須擇是身如浮雲何所為定跡顧憐性梗野雅  
嗜祇泉石陳力怯荷芟康屯况無策強顏雜班綴頗覺  
非本色時清早得歸永願守蓬華

去歲重陽日得彥威信附六月間二小姪及從  
弟姪所寄書自蜀聞遞中附至歷言去冬今春  
所遭兵禍及有司督迫科調之苦喜其存全哀  
其窘感灑涕如霰寄訊邀其下峽而邊事又告

急未知其達與否也會杪冬見邸報宣諭使者  
余公侍郎改命投鉞盡護蜀師意欲以此事歸  
控骨肉會聚茲事其諧矣喜極涕零遂成長篇  
令節恩賜沐把菊開清尊天涯信音來拆緘為一欣展  
視未竟幅淚雨溢悅怱辭家甫八年邊塵覆全坤平生  
幾親故半為兵死魂縱脫虎口涎亦復馬鬣墳所幸二  
猶子從弟偕諸孫崎嶇矛戟中偶得性命存意欲守丘  
壠死不去榆枌是時陳理卿受命開帥垣奮身艱危際

勉圖戡濟勲。鏹壕峙城壁。鋤荒列營屯。敵至誓固守。為力良艱勤。變故起肘腋。轅帳塞贛輜。一死事則已。萬恨誰與論。遺氓能幾何。天未許貸原。貔虎暫斂退。寇盜還紛紛。哀我數子者。挈孥競驚奔。亦不免維繫。恐迫甚溺焚。掠奪幸得脫。歸來匿空村。生涯蕩無餘。暴斂何寡恩。萬里遠訴我。重我憂心熏。爾苦我得知。爾創我得捫。豈不憶松檟。歲時薦炮燔。永惟宗祀計。忍自遏其源。威也託我久。尚以窮愁言。寧不思爾曹。命危豺虎羣。安得田

二頃有屋休寒暄順風招之來相與共饗殮皇后職生  
化蟄蟄庶且蕃胡忍趣其斃猶割如羔豚夙傳老上殞  
國亂猶絲棼若為秋風高已復羣吠狺呼童具黑藩襪  
紙當前軒萬一郵傳通庶幾信息聞嚴裝理航棹及春  
下荆門余公新受鉞尚義氣薄雲感我骨肉念不難隻  
手援茲計不早決噬臍何復云憤極思一吐聲出輒復  
吞長謠欲上訴九穹隔重閣劫運極必復玉石可不分

感事建除體二首

建國維藝祖受命同有虞除苛五閔後返朴邃古初滿  
盈持以道德澤久不渝平治二百年中原忽榛蕪定亂  
得高皇如日升昏衢執中嗣堂播奕葉垂範模破碎今  
已殘敵人踵闕闕危哉武休破漢沔幾丘墟成功賴諸  
將三蜀仍覆盂收藏問何時官已迫征輸開倉儲百穀  
為我供軍須閉闕且堅守民力庶少蘇

建大將旗鼓遴選茲維艱除授得其人國勢維泰山滿  
朝綬若若熟謀須萬全平生想衛霍摧枯無留難定論

真蹟武亦足激懦孱執爵醑太宮感慨清淚潛破敵豈  
無策百年祇長嘆危機屢反復地險失故關成敗雖運  
數人謀忌詆謾收民心第一根本無創殘開納智與勇  
及時護風寒閉口勿多言天道諒好還

木皮口紀事為故沔戎帥何進賦也

驅車木皮口地接嘉陵市山川鬱盤紆草木慘憔悴昔  
在歲辛卯大將何慙子行營與賊遇力戰遂死此道逢  
田舍翁款曲問所以耳目親見聞朴忠今無比沉鷲老

不哀甘苦同戰士以此得士心急難不相棄閫制力主  
和豈虞敵情詭幣篚方交馳羽書俄狎至初冬二十五  
至入我內地或渡河而馳或截路以伺俄然幹腹來陟  
若自天墜諸軍抽摘餘精銳能有幾千兵僅烏合轉鬪  
殊未已可忍負將軍同生亦同死落日塵土昏鼓寒聲  
不起至今堆阜間白骨猶紛委語罷聲悽哽相顧潛灑  
淚念昔佐戎軒世屯未云弭主公極仁明慘惻念此事  
露章求恤典爵子嚴廟祀意將勸忠臣為國當盡瘁儒



守陳西和武將田與李

田燧  
李冲

後先被褒錄名姓編國史

敵知吾有人心寧不畏忌自古重徂征司命在主帥委  
託或非人險阻那可恃嗚呼數君子一死甘若薺推原  
其本心死奚益於世事大繆不然舍生而取義乃知丈  
人吉易自有深旨往轍忍復云方來那得諱長謠激淒  
風嗚咽嘉陵水

祖餞三山趙茂實二首

茂實毓秀麟定振采鷓班由掌故籍田令試

館職歷正字校書秘書郎載筆史筵轉丞容  
臺兼南宮舍人擢直學士院晉貳戎監擢宗  
正少卿駸駸禁塗遽請外補宰相以上意留  
行茂實請益力詔直煥章閣佩以永嘉郡二  
千石印組二三執政及在庭百執事咸愕眙  
惜其去於是館閣諸彥以茂實為冊府舊游  
請置酒道山堂祖餞飲酣有誦大蘇公東海  
獨來看出日石橋先去踏長虹之句相約賦

詩為贈分韻凡十一人餘三韻三人各補一篇淳祐改元龍集辛丑中元節也分韻得東

字踏字二首

煌煌洛陽城衢街萬國通車塵日交驚襟期那易同日  
成者誰歟言笑春怡融我自商聲歌君亦手絲桐西風  
忽以厲高情逐雲鴻輟筆金鑿坡一麾滄海東補過要  
汲直草詔須陸公盈庭愕相顧蹇蹇胡不容君去我獨  
留我闕誰與攻况復狗尾續羞顏蓮炬紅

三生巖壑安失脚紅塵踏羨君得郡去勝事踵康樂雲  
海渺無津烟霞互開闔似聞石門薜猶帶屐齒蠟惜哉  
荒遊誤竟為時論薄秉誼以事君奚間睽與合矧是侯  
社貴艱哉保障託宣室恐渴思趣歸職獻納我拙念請  
閒鴈蕩恣飛屨及君留郡齋為我拂塵榻

送本仲聘君分韻得良字

國家全盛時幅負萬里長委幣到空谷靡才不周行豈  
其貴自珍而病匿弗彰南渡今百年蜀遠天一方彛典

僅歲貢幾人與庭揚况復多沮撓誰不甘摧藏戎軒起  
者哲禮羅極精詳穎脫者家文玉質而金相邂逅志念  
同惻怛根本傷拔尤首推轂有詔催嚴裝吾黨一吐氣  
彙征類破荒慨昔升壁水瀝血籲紫皇百壬眩縮頸斯  
文彌耿光倫魁合騫飛吏選何回翔孰知五色絲未盡  
一皂囊殺氣昏宇宙涿流渺津梁何以郤外侮蓋先正  
皇綱翕合賢德聚更須股肱良壽脉庶可續客邪不難  
防癩思耿宵寤傾耳鳴朝陽名節勉自立官職那得忙

大難我同榜諸老競剡章渠豈州縣材籍甚英俊場相  
期上連璧少待同飛航我自分斂退為君喜激昂流目  
大江滿執手薰風涼豈無佩續紛奮起相頡頏世味竟  
落寞暇日聊相羊友誼古所重心知遠難忘歲晚有良  
約岷山瑶草芳

以堰事走永康宿金馬早行見雪山排霄極明  
麗因感行役之苦叩守程叔達郎中便民五事  
欲牛溪轉船朝廷下其議於帥臣監司不知衆

議僉諧否也

雨響清客夢雨晴催客行迴野曉寥落界天玉崢嶸銀  
海眩雙照瓊鈎對孤明英雲強吐吞杲日還晶熒邂逅  
得竒觀瞻相愜幽情意疑邃古初立極扶西傾誰知絕  
險外復有蓬婆城青天危輓輸剽攘加怖驚奏函籲衆  
感仁言躋宗英早願虎口奪少紆魴尾頰不勞嚴僕射  
分弓窺敵營

又以堰事滯留姜主簿學父載酒相勞於離堆

新繁宰鮮於子清永康理曹季德夫導江士解  
於才卿同會

穿江慨秦守瞻岷懷子長成書著不刊明德益難忘千  
載志尚友百里職勸相每負伐檀恥欲期盡心償籠石  
飽冬霽雲車喧春陽經始愧前哲憫勞得仇香選勝山  
水窟浣我冰雪腸飛憶集諸彥引睇周八荒暖翠凝黛  
面晴雲抹川梁清歌勸引滿佳趣殊未央舉頭萬仞雪  
中有千斯倉采薇亦勞止薄斂恐未遑何當洗甲兵無



以累廟堂文移寬郡邑靴鞭卻藩方源清流乃浚葉瘁  
根必傷念此意愴怛憑高歌慨慷不如邀飛仙更與酌

一觴

李西清先生創凌霄觀於潼川府治紅樓之上

賦詩敬和韻

丈人氣湖海合卧百尺樓引袖麾八極無處豁前眸肯  
以治城志而忘天下憂窘步爭徑捷危炊迷劍頭攀天  
限九關起家先一州顧瞻衆山會慘澹春色浮憑高展

遐眺幾幅烟雨秋象緯逼紫宸  
颺輪通十洲吏衙散鳧  
鶩野盟參鷺鷗所思隔秋水倚天省  
吳鉤寄懷廣莫外  
任運逍遙遊遐哉郝使君一往歲月道  
名字著不朽實  
繫杜參謀後先五百年意氣有此不  
不須蘇門嘯我自  
商聲謳烟霞雜揮灑風月共獻疇跡  
忝梁苑舊目送涪  
江流可能呼小艇醉歌賡四愁宇縣  
暗矛戟田原輟耒  
耨念公志經綸季孟忠武侯肯袖斲  
泥手江海寂寞休  
檻前水東注鼓柁不可留撫翼附青  
雲恐滯鷺谷幽

送考功劉大著出守嘉禾分韻得相字

夙昔抱竒志取友周四方  
遠遊阻風塵隱思鬱衷腸  
羞以麋鹿性綴茲鴛鴦行  
三年去復還同省皆望郎  
劉侯交最久德履金玉相  
佩瓊矯衆嫵製荷耿孤芳  
暫寄錦衾直倚登白玉堂  
忽以刺郡請翻然整歸裝  
安輿擁鶴髮懷綬榮錦鄉  
那知檇李城駢竹喧道傍  
矯首候鳴騶如渴須飲漿  
紫禁屢入對從前幾封章  
肯袖活國手春疇課耕桑  
納約易為入公寧久回翔  
熟看氣弘毅致遠

可易量蹇我歸未能遲留重慙惶亦思巧一麾庶以毫  
髮償樂莫樂心知執手歌慷慨安得飛霞佩雲霄相頡  
頏

送李季才戶部出守衡陽

君來我去國我還君得州世事巧違人參辰不同謀庚  
午蜀貢琛君名亞龍頭回翔三十年班序晚見收邊聲  
震宇縣樞筦須良籌心期白粉闈晉卮翠雲裘忽以外  
庸請高軒擁前騶展也清廟器若為南國侯事會轉輾

輜材難費搜求似聞石廩峯瓊佩鬱飛浮其下維清湘  
杜蘭滿汀洲官閒足娛玩聊以寬隱憂良會當期玉  
泉來蹇修芳聲保不沫歲晏終綢繆我迂諒無補行世  
况鮮儔言歸承明直塵容祇含羞思土重紆軫風埃苦  
淹留佇君建名業同理湖峽舟白首三間茅相依岷峨  
陬

遂寧喻生畫鹿甚精介同官梁知丞謁余因令  
作八幅圖帳適赤城觀主惠一鹿甚馴未數日

忽又一鹿奔至縣圃非邑士所豢養者竟不詳其所自來物理感召畫龍而致真龍似未足為誕也借邑士張權父詩韻以贈之

生不逮治古郊藪觀鳳麟頗愛麋鹿性似是我輩人食  
革詠周雅祝網依湯仁幸不主八卦非闕十二辰無魂  
休我欺掇皮詳皆真佳哉喻生筆能與元吉倫雅可簿  
書堆坐有澗壑春適意自起卧匿樹如徼巡便思投手  
板長嘯岸白綸藉爾為我駕仙會陪末陳人生幾薜華

洞天自靈椿謹護此畫本勿遣侵俗塵

縣齋秋懷

璣衡幹霄極裘葛參歲功榮瘁均一氣何獨悲秋風往  
哲不我待今俗誰與同渥丹易槁木鬢鬢忽飛蓬丈夫  
秉壯節自信無終窮願勒羲和鞭長繫扶桑東

弱齡去激昂漸老增感慨所親日以疎既往不可貸世  
途轉艱棘意行懼顛沛乾坤一戰場今古幾變態超超  
浮丘伯何修獨堅耐駕言從之游永嘯塵劫外

幼學自魯鄒素心早管商誰令簡書縛課我星火忙我  
自友古人渠肯兄孔方飛檄浩盈几泛窺隱中腸閣束  
且登樓雲鴻秋着行

春渠鍼綠秧秋畦壓黃雲積憂稍緩帶轉手俄空困况  
彼東人子石田加灼焚算緡方趣辦蒙袂須勸分誰為  
本根慮天高聞不聞

瞿瞿彼奚窺樊圃漫折柳金甌費將護鼎餗戒顛覆屯  
雲暖將夕西風一搔首沉思扶持計誰是頴脫手需臚



母久翫利處那得久癩思恐傷人聊復一杯酒

雲濤扶胥口烟雨匝澤涯知心隔湖海悠悠我之思玉  
堂真學士衡門且棲遲那知古渠陽無地逃駭機昔在  
肩洪崖風騷屹相推道遠苦莫致孰與一解頤皎皎彼  
白駒空谷誰繫維吉士國元氣須造物扶持

蜀西金天晶氣稟勇於義時臺紬書樂一麾豈其志堂  
堂蜀公孫加璧不可致語默未易闕經綸那得避君看  
西山岑鬱積好雲氣膚寸澤四海斂退無一事持以問

亨泉寒冽恣自閱

曉案環吏牘朱墨勘舛差自公借隙光書函眩眼花千  
里有命駕同心樂無涯秋空霜月明秋山雲氣佳留連  
忽重陽列坐粲九華良會不可失醉酣整烏紗

古人日以遠古心誰與共陳編如有覲整袂神自竦晝  
短疲衆喧夜永息羣動賴此一炷膏假我數行誦古今  
費探討心力老賓送世味久已空餘業此偏重歲晚儻  
得閒只願書冊擁

學仙宗無為學禪空萬緣自昔抱竒志師心為真傳失  
脚墮世網茲事幾棄捐惟有一念息不受物欲牽空花  
起滅處我心長泊然冷暖渠自知妙處非言筌

勞農安德鎮古刹過句德華園二首

青燁留中分風日和且醞冰綃熨遠空雲錦織方甸農  
政自古然長官欲身勸皤皤彼黃髮懇懇余素念胼胝  
無乃勞推瀝不敢怨文移窘星火日夕覩顏面所欣歲  
洊熟况復江可堰蒙袂奚自來儲粟何以贍辦香企璇

穹徧界雨美饌

天宮雨美饌  
華嚴經偈

使民樂耕桑為國罷征戰

堯俗可盡封嗚呼何日見

招提款松竹古碣閱楷籀惠然二友佳共此一卮醕扶

攜涉幽園邂逅展遐眺海棠飲未酣芳檻破微笑何如

老桂叢傲睨幾年少清言愜襟期轉首俄夕照復與度

香靄石梁穿窈窕留連得竒賞傲朗可無誚聊憑一餉

歡緩我憂心悄明知古難挽嫌與俗同調民勞儻得醫

氣脉猶可壽

送平章解機政以保寧之節榮還里第

孔山高差我其下一區宅敷床萬牙籤寧取籛金積委  
身事君子星駕莫遑息豈不念林巖政爾柄樞極巨川  
爾杭之陛下心以懌累章拜俞旨告廷敷顯冊一笑堂  
印拋我友浮丘伯士以名德重如護萬金壁受寵惕臨  
深持滿常懼溢恭惟學古肖富有經世策探懷取二三  
興運際五百賢人如參朮足以壯國脉茲理要密庸寧  
復膠於迹肘後可無傳能使壽金石先生還孔山宸奎

揭素壁似勝平泉墅林立萬株石向來翹材館楹楠富  
山積終焉愧輪囷可能補寸尺澗潮浪拍天歸颿風借  
力百拜壽斯文華皓配南極何當脫拘攣日侍維摩室

欽定四庫全書

滄洲塵缶編卷六

宋程公許撰

七言古詩

瀘水清

吏部秘閣二江范公以東帥治瀘更七年令  
行化孚今年春北鄙用師計臺下令征夫役  
於兩蜀州縣奉行急如星火公斥帑中之儲  
為瀘民代輸其半餘以歲糴軍糧米本先為

敷納瀘民晏然不知有夫調之擾余於公無  
夙昔之好曩辛未春會公來攝帥事尾賓客  
一拜後塵蓋心敬其為古遺直宦游西州有  
自富義來者為余言之慨然有感援筆以賦  
將以表公論於吾黨非有私於范公也作瀘  
水清

瀘水清瀘水之清如鏡平蜀江西來流沅沅內江胥命  
如逡巡兩江合處聳百雉表裏益梓巴夔分如戶有限



齒有唇雲南與夜郎甫隔東西鄰山川之險守在人武  
侯氣馘千古猶長存有來范侯人中英蜀國忠文之子  
孫清姿勁氣排秋旻立朝物望高縉紳睥睨衆醉甘獨  
醒烏臺縱好羞呈身十年江海心朝廷瀘水清我歌慷  
慨君試聽蜀東諸鎮瀘最重范侯之來更覺一面如金  
城東軍之驕昔所患南詔之黠那易馴我侯方寸澄止  
水鎮以寡欲撫以誠重門嚴柝夕烽冷紫邏雜耕膏雨  
勻七年逗遛不得去邊民愛侯有如父母親今年北邊

羽書急兩川夫調紛苛征吏敲門農輟耕期限迫星火  
頃刻那得停黃金棄賣如土賤楮幣翔踴餘貫緡立談  
之頃富作貧縣官忍復規其贏五十六州洶洶如浪沸  
獨有三瀘之江清復清有客東州來為我委曲陳范侯  
疇昔澹無累貫朽之積本為民二分官與輸一分一分  
猶恐民顰呻軍儲糴本仍借給少待秋熟寬作程風和  
日晏江上村老醉稚擁爭扶迎吏呼何曾怒目矐只有  
提壺布穀日日喧曉晴樂哉三瀘之國有如華胥與大

庭九重天遠呼不聞侯忍棄我歸鄉扮強敵游覓尚三  
秦邊頭何時能撤屯帑無羨帛粟空囤將驕卒情難使  
令義徒星散自嘯聚往往千百相為羣秋霖淫溢稼不  
登仲冬虺虺雷鼓轟我心隱思鼻酸辛人情玩愒渾不  
悟有才空使棲巖扃我聞瀘民愛侯心不釋祝侯壽考  
備福如忠文侯雖潔身翫泉石獨忍一息忘吾君何時蠶  
書自天下詔侯起家朝紫清扶持國論開太平整頓宇  
宙驅妖氛却學忠文挂冠神武門荀輿野服歸游峨與

岷杜陵昔覽春陵行知元使君實國禎悠悠千載缺嗣  
音擊節為侯歌斯文瀘水清瀘水清采詩之官今何人  
歌成肝膽空輪囷

青山高為宋郎中德之作

青山高六六峯瑤鐫巒嶻千萬仞斗起西南天半空蒸  
嵐噴薄不得洩翠屏掩靄深幾重不知丹梯委曲到何  
許飛樓傑觀縹緲疑神功丈人天上足官府愛此疊嶂  
高龍從奏疏白玉京此山上帝之離宮臣請為帝守宮鑰

檢課列僊功行之異同帝憑玉几領其奏導以絳節雙  
青童岳靈業我遠奔命其下瀆鬼趨濛鴻丹書校錄曉  
繼夕朱衣執侍嚴且恭赤明龍漢屈指今幾劫珠幢羽  
帔可想不可蹤雲璈鏗鈞洞天曉步虛寥亮閭闔風有  
時山空夜永斗柄出復沒眩眼千炬煜煜燈吐紅嗚呼  
青山高兮六六峯丈人宮闕兮遠層穹飛僊來往兮安  
得逢山中兮媚幽獨炬山緒兮雪谿翁形癯霄漢舞  
皓鶴神茂晴巒森老松三生曾侍丈人之左右出入孔

老竺乾之學該以通把茅山間二十年幽棲活計那韓  
窮白雲四壁兮風月窻攏玉泉如飴兮栢實可饗丈人  
憫世日混濁勅遣下山開瞽矇被髮鞭麒麟駕霆呵靈  
窿高岡一鳴衆鳥瘖不吐修門再入九虎獍以攻飄然  
整我飛霞佩佳山水處挾冊從僊槎尚有樓突兀蕩漾  
萬頃風濤中酒酣浩歌蘂珠三疊之險韻出沒蛟蜃悲  
魚龍

公自東南歸舟槪象  
浮槎有樓壓其上

道逢仇池老僊伯握手一笑

墓鼻煙溟濛混成菴中據梧默數息明霞閣上彈缺看

飛鴻丈人嗔不歸鸞歌鳳舞瞻聽慵我聞至人離世不  
忘世肯學山澤之臞塊獨守此虎豹叢歐子來自神清  
洞樂天故棲蓬海東手携天孫雲漢之機杼下與世俗  
一洗組纂之拙工後先相望幾百年帝命何獨私與公  
青山之阻煙霞濃六時滴水聲玲瓏猿鶴何知強悽怨  
祝公不用思慙慙我願飛章夜扣丈人九僊之寶室世  
路荆棘人心蓬洗氛滌祲待雨露驚曠醒醉湏筮鏞乞  
公且住千百歲要使民有司命儒有宗色絲不盡今古

曾帝袞何闕須彌縫笑談變俗為時雍青山青山長好  
在洞天氣物何曾改歸來瑤簡朝丈人坐看桑田變滄  
海

岷峩歎

坤文之秀世載其英行義詞章史不輟筆頃  
歲以來堙厄不振長安日遠人情鬱憤作岷  
峩歎

出門厭氛囂歸卧集萬感憑高一以眺忽覺岷峩慘岷



峩山色千古同非煙非霧愁溟濛杜陵昔歎珠玉走彼  
猶有幸天府供人才何但珠玉貴不得與爾包貢同上  
明光宮山靈對我有慙色茲事如何專汝責非關地氣  
有衰旺直恐峽山之流日夜蕩瀦傷土脉不然君相造  
命天地同其公車書萬里文軌通南金東箭輸不竭岷  
峩之產何獨窮沉思夜繼日嘆息復嘆息忽夢神官自天  
下手持山靈一尺檄鴻濛昔剖分帝命作鎮主坤文石紐  
之禹為帝平水土周家創業繫我彭濮人紀信忠漢世甘

受黃屋焚何武仗劍起義不屈莽新費貽任永恥為井  
蛙辱張綱李固義烈排秋旻炎精焰冷國鼎峙惟我全  
蜀倔强為漢臣人名節九鼎重餘事文章兼隱淪子  
雲相如王子淵康山之李金華陳涪江釣叟卜君平千  
載猶能想清塵皇皇藝祖得天統北辰中天衆星拱蜀  
遠只在殿西頭一言撤盡藩牆壅陳蘓范氏奮孤寒事  
業詞華兩推重渡江勲績張與虞太史之李如晉董江  
漢炳靈世載英撫之前牒如丹青昔何烜兮今昧昧山

靈未必真忘情富貴由來多捷徑強聒最為蜀人病君  
不見山澤之臞宋郎中奏篇語泄經遠屏經明行修李  
兵部陞對萬言傷骨鯁氣豪最說薛祕書去國七年惟  
日飲陛下何曾讐讜言睢眦萬目寧汝捐傷哉三君皆  
九原抵玉於地那得全幸今耆舊滿巖穴一一無非爽  
邦哲柱史德望國著龜開府忠丹老彌烈參政未起東  
山卧李也立螭著名節少卿僊谷勤著書渡瀘歸釣二  
江雪侍郎斥還病少瘳校書執喪憤尤切廟堂何忍蜀

才棄渠自方頭觸人忌岷峩為渠方含羞渠不知悔尚  
我尤汝行為我丁寧說與諸賢道二府榮途豈難到九  
重天上列僊班厚祿高官清且要鑿方何能入枘圓使  
少貶之寧不然我聞斯言意懍怵夢覺披衣獨惆悵窮  
達其如天命何為士當先識趣嚮諸賢等是儒中英秉  
心那知有得喪憑誰為我謝山靈彼達觀兮寧可誑嗚  
呼參井之躔五十有六州文風自古能與齊魯侷三光  
氣全愛護猶如心與腹今半天下視之乃若贅與疣戀

芻伏下姑汝留不然朝奏暮斥急理沔峽之扁舟君看  
兩三使節晨星猶下此六六州縣皆依流縱有志士能  
矯修長安日遠可想不可遊立賢無方自古訓誰能叩  
閣上訴十二之冕旒才生於世養之艱而折之易譬諸  
豫章杞梓倉猝寧可求風塵瀕洞暗宇縣不有蒸徒誰  
與謀白駒空谷長逍遙可能繫之永今朝我歌慷慨兮  
豈獨私為岷我愁勞心悄悄兮實與天地先其憂

憶昔行送李成之徵君

憶昔與君同射策同舟同館心膠漆萬言入奏甘棄置  
賴有湖山好看客歸裝濡滯及黃池半菽寒道作除夕  
慨慷相與期古人聊復名場借梯級君家三秀立分鼎  
太阿覺君鋒更穎吏行鳧鷖閔塵空寒露玉壺負光  
炯五羊僊伯兩眼明月秋薦書萬里徹冕旒四賢同時  
一網收朔風扶拖長江流遲頑我自費推激隱憂百罹  
霜鬢出未能勇決便幽棲寧免隨陽晚殘粒送君矯翮  
玉霄去為我一破胸快悒向來四海李兵部正色立朝

古遺直九原凜凜有生氣餘憤須與君湔滌世故翻覆  
况多端沉思使我心膽寒誰生厲階今為梗涓涓不窒  
驚濤瀾不知聚幾州鐵鑄此錯百尺竿頭一步底處著  
天位天職特用軒輊人明眼勘破定何物波流何可金  
石轉鮑肆詎能蘭麝奪君不見考功望郎諫疏瀝忠赤  
垂紳滿朝皆太息信有宗工妙繩尺

洪舜俞應詔上封事甚剴切蜀士得

東南書云朝紳見之皆服  
崔尚書先生知人之明

梁園我亦塵下客法當冗散

逃百謫滿意諸賢拱霄極謹言正論囊封溢國勢不難

一枰活正途未易荆榛闢有謀勿憚時造膝救溺拯焚  
奚可失海南波寬老龍蟄朝朝滿澗翫泉石當為諸賢  
失衰疾我亦三叫喜動色早願采薇休戎役

涪州荔子園行和友人韻

愁雲暖日愁無邊荔枝園下客艤船嗚呼宴安毒於鴆  
燎原戒之螬火燃揚家妖女去復入開元天寶治亂如  
手翻覆間綠雲一縷天上去食自不旨寢不安長生呪  
語月皎皎沉香醉夢春酣酣羯鼓數聲花破萼霓裳



一曲天開顏薰風殿開苦嫌熱驪山聯轡來遊盤汗綃  
紅透心渴煩荔枝不來慘不懽飛塵一騎闖山曉奔騰  
那知血濺道一朝羽檄漁陽來決策西狩殊勿草百年  
宗社棄若遺何計奈渠春風貌雨鐸琅璫驚昨夢雲棧  
崎嶇回馬首淒涼故驛疾揚鞭歲月轉眼弩落弦張后  
李父自一時西內荒階滿苔錢金鑑難忘曲江相語頌  
長憐聳叟元涪陵荔枝不須辨故物紫金鱸骨何幸還

陵園

舊詩話以杜牧之一騎紅塵之詩謂明皇以十月  
幸華清荔枝熟時未嘗在驪山然咸通中袁郊作

甘澤謠載許雲封所得荔枝香苗曲云天寶十四年六月一日貴妃誕辰駕幸驪山命小部奏樂長生殿求曲未有名會南海獻荔枝因名荔枝香則知荔枝熟時嘗在驪山小杜詩乃傳信也

### 藥珠歌

三華真士鍾若谷冥心北極創築靖館於宜春  
郡西三十里之獅子峯勢極雄秀足以駐天  
真飈馭延國家景福藏室經始工力宏大郡  
守岷下程某為歌藥珠七言一章俾持以謁  
檀度者

五雲鬱勃天九重俯視人境塵濛濛元和遷校品秩穹  
以帝命鎮北坎宮玄袍金鎧丁甲從洞陰戰勝魔絕蹤  
際江之涯鍾氏童宿運冥契晞玄風躡屩千里心忡忡  
懍恍忽與師匠逢桑梓歸悵敢不共精廬築就鈴岡東  
州西一舍獅子峯煙霞萬壑鎖鬱葱勢與紫霄爭長雄  
樓觀營築擬翠蓬真遊下駐鳴笙鏞可無法言牖羣蒙  
帝何言哉層穹窿溟濛未辨奚所宗五文開明日瞳矐  
三洞流出金口中瑤函錦囊密緘封甍輪八面轟靈窿

駿奔百靈翔六龍一念與誦萬過同登揖金母朝木公  
六天獍戾數有終申命校錄帝所恫保制劫運禳災凶  
剪馘鬼怪囚北艷邊垂罷戰年屢豐妖氛退掃正道隆  
臣許職牧羞妄庸願見皇圖還時雍藥珠七言歌春容  
為師勸相鳩僝工吐嗟千桂凌碧空開度益廣積累功  
丹臺列名僊籍通伐石著詞傳無窮長與此山同峻崇

唐彭州改剏南樓為賦長歌

小洛陽城春日醞

彭州牡丹花品極多西南號為小洛陽城

翠幙家家誇國

艷園花命酒十日狂何如水月山雲日日長相見西州  
藩牧最佳處古木陰森湖潏灩湖湄傑觀倚南牆剌雨  
催風歲久不能繕後先知有幾賢牧因循何啻閱亭傳  
算緡懼不貸主計星火那能卹諸縣丹崖唐侯來布宣  
世故平生金百鍊能將姦竄先杜斂不勞民膜加鍼砭  
焦心常念足公儲退食遑暇娛賓燕迨茲再稔治最成  
聊爾計工財力羨岩堯飛檻抗雲表顯敞華堂屹湖面  
搜攬一州勝處尋丈間恍覺蓬萊鼇首抃樓成侯已迫

瓜戍澹雲寒烟有餘戀君不見高詹事吟詩花嶼巴箋  
絢又不見宋朝散照坐鞋紅玉壺勸至今子美子瞻詩  
集中能使吾州千古風流擅唐侯美政前哲同能自勒  
文比黃絹謏陋愧我拙吟咏漫綰秋蛇汙碑篆江山風  
月今猶昔墨客詞人元不欠誰能落筆萬丈飛晴虹九  
鼎雪山之銀棚江練

送仲嘉弟東歸赴湖州長興尉

喬松天與歲寒節直從拱把禁霜雪如君生小樂真筌

衆說咻之莫能奪青春閉閣蛾眉怨永日啖茹庖煙絕  
交朋勸止徒爾為我亦無言可開說老親坐堂眉不開  
姑請聊向人間來人間可欲如涕唾此心久已同寒灰  
太虛浮雲漫塵點明鏡過影常往回宰官居士等人耳  
捨喧取靜非兼該知君心量已超越去盡障塞真奇哉  
王城蝸屋欣再睹燭盡鴉啼夜深語云從投足窺吏曹  
始知敝屣人爭恥長興風物吾所羨朝拏扁舟晚叩縣  
霜刃割魚慎莫嘗唯有青銅可照面我行作吏三十秋

日暮不歸鳥飛倦臨分欲效昔人言畏子機鋒如閃電出  
門揮手即江湖猛利應無兒女戀

題會慶建福宮長歌

赤城峩峩五嶽尊

青城亦名赤城

帝命作鎮西南坤崇岡遠自

太白分旁騫三峩下荆門黛面負辰如帝宸羣峰翼趨

候臨軒耿耿千柱棲雲根黍禾之福此駿奔叢霄其上

為崑崙上帝宮闕森五雲統御三界庀列真精廬福地

周八垠稽首丈人希夷君鼎峙潛廬猶弟昆

道書赤城山九天丈



人與潛山司命廬山採  
訪使者同為三山真君  
僊班峻極何司存事嚴跡秘誰

得聞我亦三生師玄元失脚世網如籠樊  
雨淚懺洗一炷熏琅函藥笈披靈文龍躡無路尋  
軒轅洪崖何處避俗喧上皇羅家插青旻  
麻姑公遠相為鄰欲往從之躡飈輪凡骨未蛻空  
逡巡白雲英爽恐未泯似聞樵叟猶花坪高尚無  
為默不言遺世獨立非不仁世自迫隘汙我清  
一杯聊共雲端論松風忽作天籟鳴浮雲富貴何  
足云度世可不保此身寸田荆棘當鋤耘鬱儀結璘時

吐吞不願泛海尋蓬瀛  
不願駕鶴朝玉京  
只願餐霞餌黃精  
閉息默坐持洞經  
長與玉皇為外臣

儲福觀謁唐玉真公主祠

華萼樓前花冥冥  
三郎雅知睦天倫  
脂田恩厚脫屣輕  
獨將泡影觀此身  
碧瑤六六秀蜀岷  
朝來鬱勃連夕曛  
石壇虛呵存谷神  
笳鼓驚散羯鼓春  
兄來問信杳莫聞

玉真入道修行於青城  
莫知所終玄宗女弟也

瑤池宴酣歸未醒  
千巖萬壑

空煙雲一念之差  
隔幾塵蓬萊  
誰信有太真  
平生我亦

厭俗氛秘錄曾受金闕君玄機儻有三生因不妨牧羊  
學初平

謝新胥口監征趙立之

立之名聞禮以聲氣相求袖詩訪我欲賡而  
未暇也後數日哀篋中所藏漢魏隋唐碑刻  
七十種相遺且逐一題識所自得特以長歌辭  
義與字畫皆道勁有英氣自念好而莫能精  
鑒習篆隸而未得活法愧無以勝此兼金疊

壁之贈借韻以舒感臆

魯壁嶧碑遠莫覩艱哉河漢訊  
鼗鼓披荒摸搭不厭多  
繙閱端能助稽古向來四壁風  
雨秋誰遣影纓羣玉府  
終年骯髒甘謫墮采采蒿菁不  
盈筥豈無蠹簡供咀味  
竟恨白石費烹煮有來剝啄契  
襟期明誠無乃同而祖  
千金湊買不知惜傾囊要我細  
摩撫評書已愧老蕭翁  
作歌况擬昌黎愈臨池強自學  
點點效顰寧容避譏侮  
隸畫聊從祖逖窺篆體那與陽  
冰侶拜嘉深恐傷廉甚

贈詩想更用心苦擔夫爭道大娘舞精思神悟失寒暑  
銛鋒未易畫錐沙拱璧暗投等黃土羊棗共嗜能幾何  
圓規寧免鋤方矩岷峨之陽一茅宇門無雜賓況市賈  
圖書悔不偕載行瞻佇崇朝不能俯遙憐兵火暗跌蕩  
守護童僕何不武辱君珍贈補闕亡金薤龍梭粲可數  
我不能捨我靈龜觀朶頰炊煙不動睡味恰與破衲宜  
殷盤周鼎愧君古人以相期瓠壺喟然問字無一奇試  
烹茗若能來與我共商畧功名兒戲可須千字淮西碑

牛頭山寺

菩薩住處牛頭山應真亦復棲其間寶坊樓觀疊高下  
新城粉雉相回環崎嶇石磴雲生屐眼波不盡涪江碧  
江外青山春自浮曾與詩翁格椽筆

為建平詹使君賦山泉

秋風慄慄宋玉宅湍波磕湧三閭祠行人莫蚩我邦陋  
離騷千古芳菲菲使君玉立荀班上得州如斗不薄之  
冠我切雲佩陸離欲與二子論襟期官居髣髴蓬島似

翠霧白雲山四圍向來專情在巖壑愛此線溜來逶迤  
搜巖剔藪作幽事便有一派銀河垂釀泉為酒白且冽  
環滁之樂同一時有時痛飲挾騷讀聲和泉石含餘悽  
天涯有客倦行李雲間小隊來追隨窺公心源瑩澄徹  
亦如此水渥不縑里無迨胥關薄征峽山今是春臺熙  
邦人恐公日邊在誰卹我老字我蚩何人勒銘泉上石  
後千萬年甘棠詩

和南風歌

悅齋先生於寶慶丙戌為郡君叔明賦南風  
之歌寄意深婉後五年自遂寧藩牧開府盡  
護蜀師又三年端平改元以憲部尚書召叔  
明袖詩渡瀘訪余於滄洲書堂輒廢元韻

華清舞徹霓裳散五音繁會宵達旦人間何限失意人  
西商淒切離騷亂我所思今在東周小雅盡廢心之憂  
更堪羌調日嘈雜徑欲洗耳寒江流那君十指含清風  
家無卓錫心願豐僊翁賞音那易得水流益瀆山益崇



疲氓望翁起憔悴蒲輪加璧幸可致請君抱琴往從之  
解慍阜財皇有意

喜雨歌

部使者鏡齋梁先生以二江灌溉之利為西  
州民所寄督有司以時繕修會久不雨夏畦  
告病齋居蔬食遍走羣望誠意孚格雨澤昭  
蘇門人華陽尉掾程某以職事出入田畝間  
聞民謠之康樂也採為聲詩以咏歌之

去年堰決秋雨靈南畝粒米如黃金縣官只道歲中熟  
輸租歸家雷隱腹老翁戒兒子鋤耨忍饑少待明年秋  
那知六月又不雨二江之流幾齟齬捷石震撼渠欲枯  
天遠不聞人號呼皇華使者民司命賜日九回恐民病  
齋居蔬食勤箋天灌口牲幣加明蠲燎煙升空忽黜霽  
須臾六合澤霧霈連宵簷響未渠休溝塍注注膏乳流  
疲氓彈指拜公賜枵腸便覺有生意邊城十年戢干戈  
鄰焰逼我將奈何可憐十室九垂罄倉卒軍需何以應

人情但知樂苟偷更須熟為根本謀察公憂民意懇懇  
定知憂國慮深遠為公志喜商聲謳願公為霖澤九州

喜雨上使君

塞垣昏昏纏殺氣春陽曠旱慘如燬老蛟熟睡呼不起  
暴虺鞭巫徒為耳雲將族兮俄披靡飛廉之怒誰或使  
綿州刺史亦勞止寢不遑安食不旨瀝膽濡毫肝作紙  
封章夜訴天尺咫電熾皴紅雷虺虺一節時有萬絲委  
旬浹頻占垤封蟻半夜流膏沃千里瓦溝佳聲密飄灑

簫韶九奏未堪擬焦卷一朝有生意夢魚之占五可俟  
中原格鬪何時已軍儲急須問庚癸剥膚駸駸幾及髓  
國脉所寄將奚恃腐儒流浪半環水月盡太倉三斛米  
干時無策頼有泚况忍懶書酣晝寐知元道州漢良吏  
可無長歌為志喜北風漲塵目易眯安得天河一湔洗  
豐年高廩萬億秭重見周道平如砥

西瞻堂

子長愛奇隘八荒岷雪千仞瓊珮鏘太守德厚民不忘倚

公筆椽輝耿光西瞻大書揭高堂倚欄起我意激昂鏤  
冰刻楮非文章男子可不志四方

送李微之以史學召

鴻蜚冥冥天宇空誰令矯翮修門壯承平在昔朝多賢  
猶念丘園天爵共泰山豹林來復去河南白雲堅不動  
斯文程伊嗣興起露門日日峩冠誦雖然去就跡參差  
高風等是光吾宗秀巖素心非少室萬卷本期供世用  
當家幸有二仲賢不妨老子琴三弄紛披竹素勤日課

蕭索松風酣午夢有來虞旌賁空谷例與蜀珍入包貢  
中興鉅典未殺青千古傳疑須折衷文孫嗣服渴延佇  
太史泚筆待錯綜姦諛已死不難誅古今一轍猶聚訟  
緇衣信能心愛士白駒誰復語含諷丈夫出處亦何常  
毫芒難博丘山重勿學退之憂史禍勿似子長誇雍從  
孤騫終不嚇腐鼠覽輝未易來翔鳳平生我亦煎百憂  
四月長江遠追送丁寧寄語季成甫東華冠蓋真一闕  
時撐小舫漾湖光莫遣紅塵撲飛鞚扶持姱節早歸來

世故紛紛付時棟

送別周憲使

春風浩蕩龍泓口  
逢逢船鼓驚雷吼  
皇華使者捧徵書  
萬里飛帆上南斗  
岷峩上下十六城  
後先持節知幾人  
公來非爭赫赫名  
止水何曾風浪生  
腕裏權衡一丹筆  
與天通處惟欽恤  
孰知疾惡有剛腸  
乃似霜空鷹隼擊  
撓之不濁澄不清  
渠自好醜吾何心  
蔽以一言仁者勇  
嗜欲淺者天機深  
疇昔聲華塞穹壤  
旰食遙知渴忠謹

紛紛鯁鯁困掇拾縱壑之鱗多漏網公歸便合橫南床  
或袖諫紙朝明光好將外臺督姦手鋤却廿年荆棘荒  
功名時來寧我貸不朽之傳軒冕外攬轡埋輪自一時  
至今日月炳前載才踈意廣一腐儒青冥倚公借吹噓  
病卧錦江八十日出門搔首空踟躕西南望遠長安日  
寒雋陸沉幾千百乞與開陳政事堂更把夾囊細收拾  
軍興料須色目繁師老力屈民煩寃養疽一朝思潰裂  
廟謀得不憂本根三年福星耀參井愛士如渴民如命



只今歸覲太微庭勿忘崇郊日延頸腐儒州縣甘浮沉  
骯髒羞作附驥蠅佇公入和南風琴磨崖大書頌中興

送崔吉甫外刺安康分韻得客字

崔郎神駿如天馬分來西極霜蹄蹴踏汗流赤不令長  
楸嘶風扈屬車亦合交河涉冰摧敵魄世無善御如王  
良可能帖耳受鞭策棧雲差我漢江碧一眼長淮天不  
隔風寒幾處索調護我有奇謀同藥石囊書行萬里三  
載京華客浮雲黯黯一掃空歸來雙劍翔鳧鳥行臺岌

繁牘山積那知退食清心堂萬卷敷床客滿席落落一  
世誰憐才令我推枕三太息翱翔半刺頭欲雪袖長奈  
何地逼迫我聞安康坦途走洛師內與荆襄益通血  
脈軍興生聚計蕭條嗷嗷悲鴻尚中澤鼓鼙何日當罷  
警濟時孰是良籌畫薰風催熟崆峒麥本根須人為  
愛惜志士慘淡意則同摻祛况復念行役君看老驥久  
伏櫪一蹴千里如咫尺醉歸為君慨慷擊唾壺天雞三

叫東方白



